

ফিলিপ্পীয়দের কাছে
স্বিনার ধর্মপাল সাধু পলিকার্পের পত্র



সাধু বেনেডিক্ট মঠ

প্রথম প্রকাশ ২৩শে ফেব্রুয়ারী ১৯৯৪

অনুবাদ © সাধু বেনেডিক্ট মঠ

প্রকাশনা © সাধু বেনেডিক্ট মঠ
মহেশ্বরপাশা, খুলনা
বাংলাদেশ

ভূমিকা

আদি খ্রীষ্টমণ্ডলীর জগতে স্মির্না মণ্ডলীর ধর্মপাল সাধু পলিকার্প খ্রীষ্টভক্তদের অসীম সম্মানের পাত্র ছিলেন যেহেতু দ্বিতীয় শতাব্দীর মাঝামাঝিতে প্রায় কেবল তিনিই বলতে পারতেন, আমি যীশুর প্রেরিতদূতদের চিনেছিলাম। সম্ভবত তিনি ৭০ খ্রীষ্টাব্দের আগে জন্ম নিয়েছিলেন। দ্বিতীয় শতাব্দীর সাধু ইরেনেউস ছিলেন তাঁর শিষ্য; পলিকার্পের বিষয়ে তিনি লেখেন: ‘পলিকার্প প্রেরিতদূতদের কাছে শিক্ষা লাভ করেছিলেন ও প্রভুকে যারা স্বচক্ষে দেখেছিল তাদের সঙ্গে জীবন কাটিয়েছিলেন। উপরন্তু প্রেরিতদূতেরা নিজেরাই তাঁকে এশিয়া প্রদেশে অবস্থিত স্মির্না মণ্ডলীর ধর্মপাল পদে নিযুক্ত করেছিলেন। আমার শৈশবকালে আমি তাঁকে দেখেছিলাম, এবং সবসময় তাঁকে সেই সকল বাণী শেখাতে শুনেছি যা তিনি প্রেরিতদূতদের কাছে শিখেছিলেন ও মণ্ডলী যা একমাত্র সত্য বাণী বলে সম্প্রদান করে থাকে।’ সাধু ইরেনেউসের সাক্ষ্য অনুসারে আমরা এও জানতে পারি যে, বিশেষভাবে প্রেরিতদূত যোহনেরই সঙ্গে পলিকার্পের বিশেষ আন্তরিকতা ছিল; পলিকার্প বলতেন, যোহন-রচিত সুসমাচারে যা যা লেখা আছে, সেই সকল জীবন-বাণী তিনি স্বয়ং প্রেরিতদূত যোহনের মুখেই বারবার শুনেছিলেন। তিনি ২৩শে ফেব্রুয়ারী ১৫৭ সালে সাক্ষ্যমর হিসাবে প্রাণত্যাগ করেন।

সাধু পলিকার্প তখনই এ পত্র লেখেন যখন আন্তিওখিয়ার ধর্মপাল সাধু ইগ্নাস (১০৭ খ্রীষ্টাব্দে) শেকলাবদ্ধ অবস্থায় রোম অভিমুখে ফিলিপ্পীর মধ্য দিয়ে যাচ্ছিলেন। পলিকার্প ইগ্নাসকে চিনতেন, এবং দু’জনে একে অপরকে খুব সম্মান করতেন।

ফিলিপ্পীয়দের কাছে পলিকার্পের পত্র

পলিকার্প ও তাঁর সঙ্গে প্রবীণবর্গও ফিলিপ্পিতে প্রবাসী মণ্ডলীর সমীপে: সর্বশক্তিমান ঈশ্বর ও আমাদের ত্রাণকর্তা যীশুখ্রীষ্টের কাছ থেকে দয়া ও শান্তি তোমাদের মাঝে পূর্ণমাত্রায় বিরাজ করুক।

১ আমাদের প্রভু যীশুখ্রীষ্টে আমি তোমাদের সঙ্গে অত্যন্ত আনন্দিত, কারণ তোমরা প্রকৃত ভালবাসার আদর্শ পালন করেছ, ও সুযোগ অনুসারে শেকলাবদ্ধ পবিত্রজনদের তাদের পথে সাহায্য করেছ—সেই শেকল এমন, যা ঈশ্বর ও আমাদের প্রভুর মনোনীতদের প্রকৃত অলঙ্কার স্বরূপ। আবার আমি আনন্দিত, কারণ আদি থেকে তোমাদের কাছে প্রচারিত যে বিশ্বাস, সেই দৃঢ়স্থাপিত বিশ্বাস এখনও স্থিতমূল ও আমাদের প্রভু সেই যীশুখ্রীষ্টের উদ্দেশ্যেই এখনও ফল উৎপাদন করে থাকে, যিনি আমাদের পাপের জন্য মৃত্যুবরণ পর্যন্তই যন্ত্রণাভোগ করলেন, যাঁকে ঈশ্বর পাতালের সঙ্কট থেকে মুক্ত করে পুনরুত্থিত করলেন, যাঁকে না দেখেও তোমরা এমন অনির্বচনীয় ও গৌরবময় আনন্দের সঙ্গেই বিশ্বাস করেছ, যে আনন্দে অনেকেই প্রবেশ করতে বাসনা করে; আর তোমরা ভালই জান যে, অনুগ্রহেই তোমরা পরিত্রাণকৃত: কর্মফল দ্বারা নয়, কিন্তু যীশুখ্রীষ্টের মধ্য দিয়ে ঈশ্বরের ইচ্ছা দ্বারাই পরিত্রাণ পেয়েছ।

২ সুতরাং কোমর বেঁধে তোমরা সত্যের আশ্রয়ে ও সত্যে প্রভুর সেবা কর—যত অসার আশ্ফালন ও নিকৃষ্ট ভুল ত্যাগ করে ও তাঁকেই বিশ্বাস করে যিনি আমাদের প্রভু যীশুখ্রীষ্টকে মৃতদের মধ্য থেকে পুনরুত্থিত করলেন ও তাঁকে গৌরব ও তাঁর ডান পাশে আসন দিলেন, স্বর্গে ও পৃথিবীতে সমস্ত কিছু তাঁর অধীন, সর্বপ্রাণীকুল তাঁর সেবা করে, যিনি জীবিত ও মৃতদের বিচারকর্তা রূপে আসছেন; তাঁর প্রতি যারা অবাধ্য তাদের কাছে ঈশ্বর তাঁর রক্তের জবাবদিহি চাইবেন। তাঁকে যিনি মৃতদের মধ্য থেকে পুনরুত্থিত করলেন, তিনি আমাদেরও পুনরুত্থিত করবেন যদি তাঁর ইচ্ছা পালন করি, তাঁর আদেশ পথে চলি, তিনি যা ভালবেসেছেন আমরা যদি তা ভালবাসি, অর্থাৎ যদি যত অধর্ম, লোভ, অর্থলালসা, কটুবাক্য, মিথ্যাসাক্ষ্য বর্জন করে অমঙ্গলের প্রতিদানে অমঙ্গল, অপমানের প্রতিদানে অপমান, আঘাতের প্রতিদানে আঘাত, অভিশাপের প্রতিদানে অভিশাপ না দিই, বরং যদি প্রভুর শিক্ষাবাণী স্মরণ করি যিনি বলেছেন, তোমরা বিচার করো না, যেন নিজেরা বিচার্য হও; ক্ষমা কর, তোমাদেরও ক্ষমা করা হবে; দয়াবান হও, যেন দয়া পেতে পার; যে মাপকাঠিতে পরিমাপ কর, সেই মাপকাঠিতে তোমাদের জন্য পরিমাপ করা হবে; তিনি এ কথাও বলেছিলেন, দীনহীন যারা ও ধর্মময়তার জন্য নির্ধারিত যারা, তারাই সুখী, কারণ স্বর্গরাজ্য তাদেরই। [তবেই তিনি আমাদেরও পুনরুত্থিত করবেন।]

৩ ভ্রাতৃগণ, নিজেই ইচ্ছা করে যে আমি ধর্মময়তা সম্বন্ধে তোমাদের কাছে লিখছি এমন নয়, কিন্তু তোমরা আমাকে আমন্ত্রণ করেছ বিধায় লিখছি। কারণ আমিও নয়, আমার মত অন্য কেউও সেই ধন্য ও গৌরবময় পলের জ্ঞান পালন করতে সক্ষম নয়। তোমাদের মধ্যে থাকাকালে সেকালের লোকদের সম্মুখে তিনি নিজেই পুঙ্খানুপুঙ্খরূপে ও শক্তির সঙ্গে সত্যবাণী সম্বন্ধে শিক্ষা দিলেন, আর অনুপস্থিত হলে তোমাদের কাছে এমন পত্র লিখলেন যার কথা ধ্যান করে তোমরা গৃহীত বিশ্বাসে নিজেদের গৈথে তুলতে পারবে; কেননা বিশ্বাসই আমাদের সকলের জননী, পরে আসে আশা, আর তার আগে আসে ঈশ্বর, খ্রীষ্ট ও প্রতিবেশীর প্রতি ভালবাসা। তেমন সঙ্গ্যে যে কেউ থাকে, সে ধর্মময়তার আদেশ পূর্ণ করে, কারণ ভালবাসা যার আছে, সে সমস্ত পাপ থেকে দূরে আছে।

৪ অর্থলালসাই সমস্ত অনিষ্টের মূল। সুতরাং, আমরা যখন জানি যে আমরা জগতে কিছুই সঙ্গে আনিনি, কিছুই সঙ্গে করে নিয়ে যেতেও পারি না, তখন এসো, ধর্মময়তার রণসজ্জায় নিজেদের সজ্জিত করি, ও প্রথমে প্রভুর আদেশ পথে চলতে নিজেরা শিখি। তারপরে আমাদের স্ত্রীদের গৃহীত বিশ্বাসে, ভালবাসায় ও শুচিতায় থাকতে, নিজেদের স্বামীকে বিশ্বস্তভাবে প্রেম করতে, অন্যান্য সকলকে শুচিতার সঙ্গে ভালবাসতে, ও নিজেদের সন্তানদের ঈশ্বরভয়ে মানুষ করতে শেখাই। বিধবাদের এমন শিক্ষা দিই, তারা যেন প্রভু বিশ্বাসে চিন্তামগ্ন থাকে, সকল মানুষের জন্য প্রার্থনা করে, সমস্ত পরনিন্দা, কটুবাক্য, মিথ্যাসাক্ষ্য, অর্থলালসা ও যত অনিষ্ট থেকে দূরে থাকে; তারা যেন এবিষয়ে সচেতন হয় যে, তারা ঈশ্বরের বেদি, আর তিনি সবকিছু তলিয়ে দেখেন, ও চিন্তা-ভাবনার কোন কিছুই তাঁকে এড়াতে পারে না, হৃদয়ের কোন গোপন চিন্তাও নয়।

৫ সুতরাং, একথা জেনে যে ঈশ্বরের সঙ্গে চালাকি করা চলে না, আমাদের এমনভাবে আচরণ করা উচিত যা তাঁর আদেশ ও গৌরবের যোগ্য।

পরিসেবকেরাও মানুষের নয়, ঈশ্বর ও খ্রীষ্টেরই পরিসেবক হওয়ায় তাঁর ধর্মময়তার সামনে নির্দোষিতার পথে চলুন; তাঁরা যেন পরনিন্দুক, মিথ্যাবাদী, অর্থপিপাসু না হন, বরং সবকিছুতে মিতাচারী, দয়াবান, সতর্ক হন; তাঁরা সেই প্রভুর সত্য অনুসারে চলুন যিনি সকলের দাস হলেন। ইহলোকে তাঁর গ্রহণযোগ্য হলে প্রতিদানে আমরা আসন্ন সবকিছুও পাব, যেমনটি তিনি মৃতদের মধ্য থেকে আমাদের পুনরুত্থিত করবেন বলে প্রতিশ্রুতি দিলেন। আর আমরা তাঁর যোগ্য নাগরিক বলে ব্যবহার করলে তবে তাঁর সঙ্গে রাজত্বও করব—অবশ্য, আমাদের যদি বিশ্বাস থাকে।

যুবকোরা সবকিছুতে অন্দিনীয় হোক; সর্বপোরি নির্মলতা বজয় রাখবার কথা ভাবুক এবং অনিষ্ট থেকে নিজেদের ছিন্ন করুক। কেননা জগতের সব ধরনের লালসা থেকে নিজেদের ছিন্ন করা সমীচীন, কারণ সব ধরনের লালসা আত্মার বিরুদ্ধে যুদ্ধ করে, এবং যৌন-ক্ষেত্রে দুশ্চরিত্র, ব্যভিচারী ও সমকামী ঈশ্বরের রাজ্যের উত্তরাধিকারী হবে না; কুকর্মের সাধক যারা তারাও নয়। সুতরাং, এসব পাপ থেকে নিজেদের সংযত রাখা একান্ত প্রয়োজন; এও একান্ত প্রয়োজন: ঈশ্বরের ও খ্রীষ্টেরই বশে যেন, পুরোহিতদের ও পরিসেবকদের বশে চলা। যুবতীরা অনিন্দ্য ও নির্মল বিবেক বজায় রেখে জীবনযাপন করুক।

৬ প্রবীণবর্গ সকলের প্রতি করুণাময় ও দয়াবান হোন; পথভ্রষ্টদের ফিরিয়ে আনুন, দুর্বলদের প্রতি যত্নবান হোন, বিধবা, এতিম ও গরিবদের অবহেলা করবেন না, বরং তাতেই সচেষ্টি থাকবেন যা ঈশ্বর ও মানুষের দৃষ্টিতে উত্তম। তাঁরা ক্রোধ, ব্যক্তি-পক্ষপাত ও অন্যায়-বিচার এড়িয়ে চলুন, অর্থপিপাসা থেকে দূরে থাকুন, কারও মন্দ সহজে বিশ্বাস করবেন না, অধিক কঠোর বিচার করবেন না, একথা জেনে যে, আমরা সকলেই পাপের কাছে দায়ী। আমরা যখন প্রভুর কাছে প্রার্থনা করি তিনি যেন আমাদের ক্ষমা করেন, তখন আমাদেরও ক্ষমা করতে হবে, কারণ আমরা প্রভুর ও ঈশ্বরের চোখের সামনেই দাঁড়াচ্ছি, আর আমাদের সকলকে খ্রীষ্টের বিচারাসনের সামনে দাঁড়াতে হবে, ও আমাদের প্রত্যেককেই ঈশ্বরের কাছে নিজ নিজ হিসাব দিতে হবে।

সুতরাং এসো, আমরা সভয়ে ও সঙ্ঘমে তাঁর সেবা করি, যেভাবে তিনি নিজে আমাদের আদেশ করেছেন, যেভাবে সেই প্রেরিতদূতেরাও আদেশ করেছেন যাঁরা আমাদের কাছে সুসমাচার এনে দিয়েছেন, যেভাবে সেই নবীরাও আদেশ করেছেন যাঁরা আমাদের প্রভুর আগমনের কথা পূর্বঘোষণা করেছিলেন। এসো, আমরা ভালোর জন্য আগ্রহ দেখাই; দুর্নাম ও ভণ্ড ভাইদের এড়িয়ে চলি; তাদেরও এড়িয়ে চলি যারা মিথ্যায় প্রভুর নাম বহন করে ও নির্বোধকে পথভ্রান্ত করে।

৭ যে কেউ যীশুখ্রীষ্টকে মাংসে আগত বলে স্বীকার করে না, সে খ্রীষ্টবৈরী; আর যে কেউ ক্রুশের সাক্ষ্য স্বীকার করে না, সে শয়তান থেকে উদগত: আর যে কেউ নিজ ভাবাবেগ অনুযায়ী প্রভুর বচনগুলি বিকৃত করে, ও এমন কথা সমর্থন করে যে, পুনরুত্থান নেই, বিচারও নেই, তেমন লোক শয়তানের প্রথমজাত।

সুতরাং, ভিড়ের নির্বুদ্ধিতা ও তাদের মিথ্যা ধর্মশিক্ষা ছেড়ে, এসো, আদিতে যে বাণী আমাদের সম্প্রদান করা হয়েছে, সেই বাণীর কাছে ফিরে যাই: প্রার্থনার উদ্দেশ্যে সুবিবেচক ও মিতাচারী হও। এসো, উপবাসে রত থাকি, আমাদের মিনতিতে সর্বদ্রষ্টা ঈশ্বরের কাছে যাচনা করি: আমাদের পরীক্ষার সম্মুখীন হতে দিয়ে না, কারণ যেমন প্রভুও বলেছিলেন, আত্মা ইচ্ছুক বটে, কিন্তু মাংস দুর্বল।

৮ সুতরাং এসো, আমরা আমাদের প্রত্যাশায় ও আমাদের ধর্মময়তার পণ স্বরূপ সেই খ্রীষ্টে দৃঢ়ভাবে আবদ্ধ থাকি, যিনি নিজের দেহে আমাদের সমস্ত পাপ ক্রুশকাঠের উপরে তুলে বহন করলেন, যিনি কোন পাপ করেননি; যাঁর মুখেও কখনও পাওয়া যায়নি ছলনার কথা, কিন্তু আমাদের খাতিরে, আমরা যেন তাঁর মধ্যে জীবিত হতে পারি, সবকিছু সহ্য করলেন। তবে এসো, আমরা তাঁর সহনশীলতার অনুকারী হই, আর যদি তাঁর নামের জন্য দুঃখকষ্ট ভোগ করি, তাঁকে গৌরবান্বিত করি। কেননা নিজের মধ্যে তিনি এই আদর্শই আমাদের কাছে রেখে গেছেন, আর আমরা তাই বিশ্বাস করছি।

৯ আমি তোমাদের সকলকে অনুরোধ করছি, ধর্মময়তার বাণীর প্রতি বাধ্য হও, সেই সহিষ্ণুতার সাধনা কর যা নিজেদের চোখেই তোমরা ধন্য ইগ্নাস, জসিমোস ও রফুসের মধ্যে শুধু নয়, তোমাদের মাঝে অন্যদেরও মধ্যে, স্বয়ং পল ও অন্যান্য প্রেরিতদূতদেরও মধ্যে প্রত্যক্ষ করেছ। জেনে রেখ, তাঁরা বৃথাই দৌড়াননি, কিন্তু বিশ্বাস ও ধর্মময়তায়ই দৌড়লেন, আর তাঁরা এখন সেই প্রতিশ্রুত স্থানে প্রভুর সঙ্গেই আছেন যাঁর সঙ্গে দুঃখকষ্টও ভোগ করলেন। কেননা তাঁরা এই বর্তমান যুগ নয়, তাঁকেই বরং ভালবাসলেন যিনি আমাদের হয়ে মৃত্যুবরণ করলেন ও আমাদের খাতিরে ঈশ্বর দ্বারা পুনরুত্থিত হলেন।

১০ তাই তোমরা বিশ্বাসে দৃঢ়স্থাপিত ও অটল হয়ে, ভ্রাতৃত্বকে ভালবেসে, পরস্পরকে প্রেম করে, সত্যে একত্রিত হয়ে, প্রভুর কোমলতায় একে অপরের প্রতিযোগী হয়ে, কাউকে তুচ্ছ মনে না করে এসব কিছুতে স্থিতমূল থাক ও প্রভুর আদর্শ পালন কর। উপকার করতে পারলে সময় স্থগিত করো না, কারণ অর্থদান মৃত্যু থেকে মুক্তিদান করে। সকলে একে অপরের অধীন হও, বিধর্মীদের মাঝে তোমাদের জীবনাচরণ অনিন্দনীয় হোক, যাতে তোমাদের সংকর্মের জন্য তোমরাও প্রশংসা পেতে পার ও তোমাদের মধ্যে প্রভুর নিন্দা না হয়। কিন্তু তাদেরই ধিক, যাদের কারণে প্রভুর নামের নিন্দা হয়। সুতরাং যে মিতাচারিতা তোমরা নিজেরাই পালন করছ, তা সকলকে শেখাও।

১১ ভালোবাসার ব্যাপার আমাদের অনেক দুঃখ দিয়েছে: তিনি একসময় তোমাদের মাঝে পুরোহিত ছিলেন, অথচ এখন তাঁকে দেওয়া পদের দিকে কতই না কম মর্যাদা দেখাচ্ছেন। এজন্য আমি তোমাদের সাবধান-বাণী দিচ্ছি, তোমরা কৃপণতা থেকে নিজেদের দূরে রাখ, ও শুচি ও সত্যবাদী হও। যে কোন অনিষ্ট থেকে নিজেদের দূরে রাখ। এসব কিছুতে যে আত্মসংযম করতে পারে না, সে কী করেই বা অন্যদের চেতনা দিতে পারবে? যে কেউ কৃপণতা থেকে নিজেকে দূরে

রাখে না, সে প্রতিমা-পূজা দ্বারা কলুষিত হবে, ও সেই বিধর্মীদের একজন বলে বিচারিত হবে, যারা ঈশ্বরের বিচারের কথা জানে না। অথবা তোমরা কি জান না যে, পবিত্রজনেরা জগতের বিচার করবেন—যেভাবে পল শিক্ষা দেন?

তথাপি তোমাদের বিষয়ে আমি এধরনের কিছু কখনও অনুভব করিনি, শুনিও নি, সেই তোমরা যাদের মধ্যে ধন্য পল কাজ করলেন ও যাদের কথা তাঁর পত্রের শুরুতে প্রশংসিত। কেননা যে মণ্ডলীগুলো তখন প্রভুকে জানত—সেসময়ে আমরা তো তাঁকে জানতাম না—সেই সমস্ত মণ্ডলীর মধ্যে তোমাদের বিষয়ে তিনি গর্বই করতেন।

এজন্য ভ্রাতৃগণ, ভার্লেট ও তাঁর স্ত্রীর ব্যাপারের জন্য আমার দুঃখ হচ্ছে; প্রভু তাঁদের কাছে প্রকৃত অনুতাপ মঞ্জুর করলেন। তোমরাও কিন্তু এ ব্যাপারে সমতা বজায় রাখ; তাঁদের শত্রু বলে গণ্য করবে না, বরং পীড়িত ও পথভ্রষ্ট অঙ্গগুলিই যেন তাঁদের ডেকে ফিরিয়ে আন, যাতে তোমাদের গোটা দেহ ত্রাণ পেতে পারে; কেননা তাঁদের সাহায্য করায় তোমরা নিজেদেরই গঁথে তোল।

১২ আমার বিশ্বাস, তোমরা শাস্ত্র ভাল করেই জান, সেই বিষয়ে তোমাদের অজানা কিছু নেই; আমার পক্ষে কিন্তু তা সম্ভব নয়। একথা যথেষ্ট হোক; শাস্ত্র যেমন বলে, ক্রুদ্ধ হয়েও পাপ করো না; তোমরা ক্রুদ্ধ থাকতে যেন সূর্যাস্ত না হয়। একথা যে মনে রাখে, সে ধন্য; আর আমার বিশ্বাস, তোমাদের বেলায় একথা সত্য।

আমাদের প্রভু যীশুখ্রীষ্টের পিতা সেই ঈশ্বর, ও ঈশ্বরের পুত্র ও চিরকালীন মহাজ্যক সেই স্বয়ং যীশুখ্রীষ্টও বিশ্বাস ও সত্যে, সমস্ত কোমলতা ও বিনা ক্রোধে, ধৈর্য, সহিষ্ণুতা, দৃঢ়তা ও শুচিতায় তোমাদের গঁথে তুলুন। তিনি তোমাদের তাঁর পবিত্রজনের স্বত্বাংশের সহভাগী করে তুলুন: তোমাদের সঙ্গে আমাদেরও ও তাদের সকলকেও সেই উত্তরাধিকারের সহভাগী করে তুলুন, যারা আকাশের নিচে আমাদের প্রভু ও ঈশ্বর যীশুখ্রীষ্টকে ও যিনি মৃতদের মধ্য থেকে তাঁকে পুনরুত্থিত করলেন সেই পিতাকে বিশ্বাস করবে।

সকল পবিত্রজনের জন্য প্রার্থনা কর। সম্রাটদের, কর্তৃপক্ষদের ও রাজাদের জন্যও প্রার্থনা কর; যারা তোমাদের নির্যাতন ও ঘৃণা করে, তাদের জন্য ও ক্রুশের শত্রুদেরও জন্য প্রার্থনা কর, যাতে তোমাদের ফল সকল মানুষের মধ্যে প্রকাশমান হতে পারে ও তোমরা যেন তাঁর মধ্যে নিখুঁত হতে পার।

১৩ তোমরা ও ইগ্লাস, উভয়ই আমাকে লিখেছিলে যে, কেউ সিরিয়ায় গেলে, সে যেন তোমাদের পত্রগুলিও নিয়ে যায়। সুযোগ পেলে আমি তা করব, আমি নিজে, কিংবা সেই ব্যক্তি যাকে তোমাদের ও আমার প্রতিনিধি রূপে প্রেরণ করছি।

তোমাদের অনুরোধ অনুসারে, আমরা তোমাদের কাছে ইগ্লাসের পত্রগুলি পাঠিয়ে দিচ্ছি—যেগুলি আমাদের কাছে তাঁর দ্বারা পাঠানো হয়েছিল, সেগুলি, ও সেই অন্যগুলিও যা আমাদের কাছে ছিল। সবকিছু এই পত্রের সঙ্গে পাঠিয়ে দেব; এ পত্রগুলি দ্বারা তোমরা অনেক উপকার লাভ করতে পারবে, কেননা সেগুলিতে রয়েছে বিশ্বাস, ধৈর্য, ও সেই সমস্ত কিছু যা আমাদের প্রভুতে গঁথে ওঠার জন্য উপকারী। ইগ্লাস ও তাঁর সঙ্গীদের সম্বন্ধে তোমরা যত নিশ্চিত কথা শুনতে পেয়েছ, তা আমাদের জানাও।

১৪ আমি সেই ক্রেসেন্ট দ্বারা তোমাদের কাছে এ পত্র লিখেছি, যাঁর বিষয়ে তোমাদের কাছে ব্যক্তিগত ভাবে সুপারিশ করেছিলাম, ও এখনও করছি; কারণ আমাদের মাঝে তিনি অনিন্দনীয় ভাবে আচরণ করেছেন ও—বিশ্বাস করি—তোমাদের মাঝেও সেভাবে আচরণ করবেন। তাঁর ভগিনী যখন তোমাদের মাঝে যাবে, তখন তার কথাও স্মরণে রাখ। প্রভু যীশুখ্রীষ্টে অটল থাক, ও তাঁর অনুগ্রহ তোমাদের সকলের নিত্য সহায় হোক। আমেন।